



*Dieu apparoit à Moyse en vn buisson ardent, & luy donne charge d'aller au Roy Pharaon, pour deliurer les Israélites.*

**L**ORS que Moyse gardoit le bestial de Iethro son beau-pere, Sacrificateur de Madian en Horeb, le Seigneur s'apparut à luy en vn buisson qui estoit ardent, sans se consumer. Lors Moyse dit, l'iray, & verray cette grande vision, pourquoy ce buisson ne brûle point. Mais le Seigneur le voyant approcher luy dit: Moyse n'approche point d'icy sans déchausser tes souliers de tes pieds, car la terre est sainte. Puis il dit, Je suis le Dieu d'Abraham, d'Isaac & de Jacob. Et Moyse cacha sa face. Adonc le Seigneur dit, J'ay veu l'affliction de mon peuple en Egypte, & ouy leur clameur, à cause de la rudesse des maistres des œuures: Pourquoy ie suis descendu pour le deliurer, & le faire monter en terre qui coule le lait & le miel, au lieu des Chananéens, & Hethéens, & Amorrhéens. Viens donc pour aller à Pharaon, afin de retirer mon peuple d'Egypte. Et Moyse répondit, Qui suis-je pour aller à Pharaon, & retirer Israël d'Egypte? Le Seigneur luy dit, ie seray avec toy, & ie seray en ta bouche, & t'enseigneray ce que tu deuras dire. Et Moyse dit, Quel est ton nom, Seigneur? Et il luy dit, Celuy qui est, t'enuoye pour la deliurance d'Israël: & pour signe luy fit ietter sa verge qui deuint serpent; & la reprenant elle retourna en verge, Moyse donc se partit, & rencontra son frere Aaron, auquel il declara la volonté du Seigneur, & prenans la charge s'en retournerent en Egypte.

*Exode Chap. 3. & 4.*